

Na osnovu člana 4.8. Zakona o prijenosu, regulatoru i operatoru sistema električne energije u Bosni i Hercegovini (“Službeni glasnik BiH”, br. 7/02, 13/03, 76/09, i 1/11) i člana 28d. Metodologije za izradu tarifa za usluge prijenosa električne energije, nezavisnog operatora sistema i pomoćne usluge – Prečišćeni tekst (“Službeni glasnik BiH”, br. 93/11, 61/14 i 95/16), na sjednici Državne regulatorne komisije za električnu energiju, održanoj 27. marta 2019. godine, donijeta je

ODLUKA

O IZMJENI ODLUKE O TARIFAMA ZA SISTEMSKU I POMOĆNE USLUGE

Član 1.

U Odluci o tarifama za sistemsku i pomoćne usluge (“Službeni glasnik BiH”, broj 8/19), u članu 2. stav (1) mijenja se i glasi:

“(1) Određuje se tarifa za sistemsku uslugu u iznosu od 0,4632 feninga/kWh.”.

Član 2.

Ova odluka stupa na snagu danom donošenja, a primjenjuje se od 1. aprila 2019. godine.

Dispozitiv odluke se objavljuje u “Službenom glasniku BiH”, službenim glasilima entiteta i Brčko Distrikta BiH.

Obrazloženje

Tarife za sistemsku i pomoćne usluge utvrđene su u tarifnom postupku pokrenutom po zahtjevu Nezavisnog operatora sistema u Bosni i Hercegovini (u daljnjem tekstu: NOS BiH), broj 87/18 od 26. oktobra 2018. godine (zaprimljen 30. oktobra 2018. godine pod brojem 04-28-5-427-1/18), donošenjem Odluke o tarifama za sistemsku i pomoćne usluge broj 04-28-5-427-52/18 od 24. januara 2018. godine.

Način određivanja tarife za sistemsku uslugu i njeno podešavanje utvrđen je članom 28d. Metodologije za izradu tarifa za usluge prijenosa električne energije, nezavisnog operatora sistema i pomoćne usluge. NOS BiH svoje fakture za sistemsku uslugu upućuje svim vlasnicima licence koji električnu energiju preuzimaju iz prijenosnog sistema.

Od sredine 2017. godine, evidentan je rast veleprodajnih cijena električne energije u regiji, što se odrazilo i na povećanje cijena pomoćnih usluga u procedurama nabavki kako za 2018., tako i za 2019. godinu. Uvećani troškovi nabavke pomoćnih usluga su, posljedično, uticali na smanjenje finansijskog suficita na računu svih usluga iz ranijeg perioda. U takvim okolnostima, Državna regulatorna komisija za električnu energiju se, u cilju izbjegavanja naglih povećanja, opredijelila za postepeno povećanje tarife za sistemsku uslugu. Prilikom donošenja Odluke o tarifama za sistemsku i pomoćne usluge od 24. januara 2019. godine, konstatirano je da prihodi i rashodi zavise od velikog broja faktora kao što su fizički obim gubitaka u prijenosnom sistemu, obim pružanja pomoćnih usluga u odnosu na planirani, cijena energije regulacije i njenog angažiranja, cijena i obim debalansa, te je definirano da će se kontinuirano pratiti primjena tarife, kretanje prihoda i rashoda, kao i prilika na balansnom tržištu električne energije, uz najavu da će se u odgovarajućem trenutku pristupiti podešavanju tarife za sistemsku uslugu.

Kako je u prva dva mjeseca 2019. godine zabilježen negativan saldo usluga u mehanizmu balansiranja elektroenergetskog sistema u iznosu od 2,017 miliona KM, to je potrebno pristupiti podešavanju tarife za sistemsku uslugu, uzimajući u obzir planirane troškove nabavke pomoćnih usluga i električne energije za pokrivanje gubitaka u prijenosnom sistemu

u periodu III-XII 2019. godine, kao i količinu preuzete energije iz prijenosnog sistema u istom periodu, a prema Bilansu za 2019. godinu koji je izradio NOS BiH.

Proračun tarife se zasniva na ponudama i rezultatima iz završenih tenderskih procedura NOS-a BiH, uzimajući u obzir vjerovatnoću realizacije troškova nabavke rezervnih kapaciteta u sekundarnoj i tercijarnoj regulaciji na osnovu podataka iz prethodnog perioda, kao i na kretanju prihoda i troškova u periodu januar 2016. – februar 2019. godine, koji je iskazan kroz saldo usluga, prema sljedećoj tabeli:

1.	Sekundarna rezerva (KM)	9.519.860
2.	Tercijarna rezerva nagore (KM)	4.671.247
3.	Tercijarna rezerva nadole (KM)	119.977
4.	Ukupan iznos za sekundarnu i tercijarnu rezervu (KM) 1.+2.+3.	14.311.084
5.	Ukupan iznos za gubitke u prijenosnom sistemu (KM)	40.893.240
6.	Ukupno planirani troškovi za period III-XII 2019. godine (KM) 4.+5.	55.204.324
7.	Saldo usluga u 2016. godini (KM)	9.532.807
8.	Saldo usluga u 2017. godini (KM)	4.826.023
9.	Saldo usluga u 2018. godini (KM)	-10.021.408
10.	Saldo usluga u periodu I-II 2019. godine (KM)	-2.017.206
11.	Saldo usluga iz prethodnog perioda (KM) 7.+8.+9.+10.	2.320.216
12.	Prihodi po osnovu salda debalansa i balansne energije (KM)	7.083.333
13.	Ukupno za izračun tarife za sistemsku uslugu (KM) 6.-11.-12.	45.800.775
14.	Energija (kWh)	9.887.600.257
15.	Tarifa za sistemsku uslugu (fening/kWh)	0,4632

Uzimajući u obzir prethodno navedeno, u cilju uravnoteženog odnosa prihoda po osnovu tarife za sistemsku uslugu i rashoda po osnovu plaćanja za nabavku pomoćnih usluga i energije za pokrivanje gubitaka u prijenosnom sistemu, te prihoda i rashoda po osnovu energije regulacije i odstupanja balansno odgovornih strana, tarifa za sistemsku uslugu se podešava na vrijednost 0,4632 feninga/kWh.

DERK će i dalje pratiti razvoj prilika na balansnom tržištu i po potrebi pristupiti podešavanju tarife za sistemsku uslugu.

U skladu sa članom 9.2 Zakona o prijenosu, regulatoru i operatoru sistema električne energije u Bosni i Hercegovini, protiv odluke o odobrenju tarifa može se pokrenuti postupak pred Sudom Bosne i Hercegovine podnošenjem tužbe u roku od 60 dana od dana prijema ove odluke.

Broj: 04-28-5-427-69/18
27. marta 2019. godine
Tuzla

Predsjedavajući Komisije
Milorad Tuševljak